

Flasche an de Mann gerbung

In friehriche Zeite war des so, dass mer mit de leere Glasflasche, in dene wu mer Mineralwasser, Bier oder Speiseeel kauft hat, ins Gschäft gang is un die an der Kassa abgin hat kenne. Die Flasche han misse sauwer sin un sogar die Eticketten hat mer loskratze misse. Manchmol ware die so stark uf die Flasche gepickt, dass mer se in in eem große Weidling erscht in warmem Wasser inwaiche hat misse. Dann ware noch solchi Einheite, wu mer leeri Flasche oder Dunschtgläser verkaafe hat kenne. Oft hat mer dorte sogar in der Reih gstann. Un wann mer vill ghat hat, is sogar e guts Schippl Geld rauskumm. Des war jo wichtich.

Inzwise han sich die Zeite geännert. Wasser un Eel gits nor noch in Plastikflasche. Die muss mer zammdricke, wann se leer sin, un dann entsorche. For leeri Weinflasche oder Dunschtgläser gits in alli Stadtteeler „Kaschte“, wu mer die ninwerfe kann. Ich sin ach schun dorch villi Derfer gfahr un han gsiehn, dass an de Gassecke mit Droht ingezeimti Dinger gstann han, wu mer leeri Plastikflasche oder Dosne ninwerfe hat kenne.

Soweit alles scheen un gut. Doch mir wisse doch alli, wie des in Deitschland mit dem Leergut is. Meischt am Wucheend raffé die Leit alles zamm was leer is, fille de Portbagasch dermit un fahre in de Supermark. Dort entsorche se alles in eem Automat, der spuckt e Zettl raus. Nohdem mer alles inkaaft hat un zur Kassa kummt, git mer de Zettl ab un die Summe vum Leergut git abgezoo. Soweit ich weess, kriet mer for eeni leeri Plastikflasch, egal wie groß se is, 0,25 Cent zurück. Also, es rafft sich schun was zamm.

Un wie is es do bei uns? Bis an eem scheene Tach mei Mann hemm kumm is un iwers ganzi Gsicht gstrahlt hat: „Weib, werf jo ke leeri Plastikflasche me weg! Ich kumm grad aus dem Auschaan Supermark un stell der mol vor: Dorte is jetz ach so e Automat, in de mer sei Leergut ninwerfe kann. Es kummt e Zettl raus un an der Kassa werd abgerechent“!

Also han ich anfang zu sammle. Es is halt in der Blockwohnung es Problem, wuhin dermit? Wie zwaa grossi Tragetaschne voll ware, is mei Mann je dermit un hat sich schun uf sei „Verdiensch“ gfreit. Noh zwaa Stunde war er wieder do un hat die Schniss verzoo: „Kannscht die leere Flasche wieder weg werfe. Es zahlt sich nit aus. Ich sin mit de Zeckre bal nit in de Bus kumm. Der war iwerfillt. Un verschennt han mich die Leit! Wie ich dann endlich an dem Automat war un eeni Flasch noh der anri ningeworf han, is de Zettl rauskumm: For mei 20 Flasche han ich 0,80 Lei verdient“!

So is die Lieb

E älteres Ehepaar is jahrzehntelang mitnaner dorch dick un dinn gang. Wann se als so beinaner ghuckt un an die vergangene Johre gedenkt han, is es ne mol zum Schmunzle, mol zum Kreische kumm. Weil es ware scheeni, awer nit leichi Johre. Sie han jeder gement, dass se de anre in- un aussewenzich beschtens kenne. Natierlich war ach mol Zänkre oder Krutzekriech an der Tagesordnung. Doch die zwaa han sich immer am selwe Tach versehnt, sin nie iwer Nacht bees oder mutzich geblieb. Ihre enziche Kummer war, dass se ke Kinner krien han kenne. Un so in ihre alde Täch fascht immer leenich ware. Sie han sich die Zeit vertrieb, dass ke Langweil ufkumme soll. Sie han mittels dere „Schissl“ alli deitschi Posten gsiehn kenne, han gheere Remmy oder Karte gspillt. Un weil se in der Stadt gewohnt han, sin se ach ins Mosi, Theater un in die Oper gang. Dann han se iwer verschiedeneni Vorstellunge so scheen dischkuriere kenne.

So is de Tach kumm, an dem die zwaa 50 Jahr lang mitnaner verheirat ware. Sie han de Tach e bissl feierlich gstat. Die Opernkarte ware schun kauft, vorher han se wille in die Kerch gehn un bete. Un zum Mittachesse hats natierlich Supp un Fleisch mit geriebnem Krien gin. Aus Hingelsfleisch war die Supp gekocht. In deni villi Ehejohre war die Gewohnheit bei dene zwaa, dass die Bäsli Lissi immer erscht ihrem Franz rausgscheppt hat. Un dernoh sich selwer. So ach an sellem Tach. Noh em zweite Teller Supp (des war jede Tach die Suppeporzion) denkt die Bäsli Liss: Heit vergunn ich mer die Schunge. Fufzich Jahr lang han ich Ricksicht ghol uf mei Mann un ihm es beschti uf de Teller geleet. Ihm wer ich die Flitsche un es Berzli, Maa un Herz vorleije.

So wars dann ach. Un de Vetter Franz hat iwers ganzi Gsicht zu strahle anfang un ment: „Lissi, dermit machscht du mir e grossi Freed. Seit sovilli Johre gammer ich noh Flitsche un Berzli. Doch immer han ich se dir gelosst, weil ich der Meinung war, dass se der so gut schmecke“!

Jetz han alli zwaa mol gut gelacht un sich vorghol, in Zukunft alles „besser“ in- un auszuteele!